

**Tabung Rayuan Hari Pahlawan 2011 Kumpul RM5.27 Juta, Kata Rosmah Bernama
Julai 30, 2011**

KUALA LUMPUR, 30 Julai (Bernama) -- Tabung Rayuan Hari Pahlawan 2011 mengumpulkan RM5.27 juta setakat ini hasil sumbangan pihak korporat dan orang ramai, kata isteri Perdana Menteri Datin Seri Rosmah Mansor.

"Sasaran kita pada tahun ini adalah sebanyak RM10 juta, dan menyeru kepada semua pihak institusi kewangan, perniagaan, para usahawan dan individu tampil untuk menyalurkan sumbangan ikhlas," katanya pada majlis pelancaran Kempen Rayuan Hari Pahlawan 2011 di sini, hJumaat.

Turut hadir Menteri Pertahanan Datuk Seri Dr Ahmad Zahid Hamidi dan Panglima Angkatan Tentera Jeneral Tan Sri Zulkifeli Mohd Zin.

Rosmah juga menyarankan penggunaan lambang Bunga Raya dilaksanakan secara meluas dalam tempoh kempen itu sebagai tanda mengingati jasa pahlawan negara.

Dengan tema 'Negara Gemilang, Pahlawan Dikenang', katanya kerajaan menggembleng usaha dan tenaga ke arah memakmurkan negara mencapai kegemilangan dalam erti kata sebenarnya.

Beliau berharap dalam tempoh tiga bulan kempen itu, orang ramai dapat menghulur sumbangan sebagai tanda menghargai pejuang negara.

Terdahulu, Zahid dalam ucapannya berkata masyarakat perlu sedar pentingnya mengekalkan keamanan dengan mengelakkan berlakunya peperangan dan sebarang bentuk ancaman yang membawa kepada keganasan.

Zahid bersama 200,000 anggota Persatuan Bekas Tentera dan Persatuan Bekas Polis hari ini telah menandatangani kain rentang sebagai tanda sokongan kepada Perdana Menteri Datuk Seri Najib Tun Razak di atas keprihatinan beliau.

Kempen itu berlangsung dari 15 Julai hingga 15 Sept.

-- BERNAMA